

Nunatsinni inuiaqatigiinnik kiffartuussinerup tiimit eqqartuussummut utaqqisitaasumut piumasaqaatit 240 timiniik 300 timinut annertunerpaaffianik annertusinissaa anguniarlugu Naalakkersuisut Danmarkimi Justitsministerimut saaffigineqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Doris Jakobsen, Siumut)

Akissuteqaat

(Nunamut Namminermt, Pinngortitamut Avatangiisinullu Naalakkersuisoq)

Siulleermeerneqarnera

Siunnersuummut saqqummiunneqartumut Naalakkersuisut qujapput.

Inuiaqatigiinnik kiffartuussinerup nunatsinni pinerluttulerinermi inatsimmut ilaatilernissaanik kissaateqarneq Inatsisartuni ukiorpassuarni oqallisigineqartarsimavoq. Inuiaqatigiinnik kiffartuussinerup Nunatsinni eqquneqarnissaa 1990-imi taamanikkut Inatsisartuusut akuersissutigisimavaat.

Aatsaat maannakkut pinerluttulerinermi inatsisikkut inuiaqatigiinnik kiffartuussineq eqquneqarpoq. Ilisimaneqartutuut pinerluttulerinermi inatsit 2010-mi januaarip aallaqqaataani atulersinneqarpoq. Taamaattumik inuiaqatigiinnik kiffartuussinerup Nunatsinni sunnuteqarnera pillugu ilisimasagut sulii killeqarput.

Taamaattorli inuiaqatigiinnik kiffartuussinerup Nunatsinni ilaatigut eqquneqarnissaa amerlasuunit isumaqatigineqarpoq. Aamma Naalakkersuisut isumaqarput inuiaqatigiinnik kiffartuussineq pineqaatissiissutitut Nunatsinni aamma ajunngitsuusoq.

Tamanna pissutigalugu inuiaqatigiinnik kiffartuussinerup pineqaatissiissutitut atorneqalernissaa Naalakkersuisunit aamma soqutigineqarpoq, kisianni aamma eqqartuussiviit inuiaqatigiinnik kiffartuussinissamik eqqartuussinnaanerannik tunngavissaqartussaallutik.

Inuiaqatigiinnik kiffartuussinerup atorneqarnissaanut tunngaviusoq pingaaruteqartoq tassaavoq inuup pineqartup inuiaqatigiinnik kiffartuussinissamut naleqquttuunera. Taamaattumik inunnik misissuisarnerit taakkulu pitsaassusiat isiginiarneqartuartariaqarlutik.

Qallunaat pillaasarnermik aalajangersagaannik Nunatsinni pinerluttulerinermi inatsimmik ilaarsineq tamatigut mianersortumik ingerlanneqartassaaq. Minnerunngitsumik maleruagassat taakku marluk tunngavii assigiinngilluinnartuummata. Tassami pinerluttulerinermi inatsimmi pillaasarneq atorneqanngilaq, taamaallaalli pineqaatissiissutit atorneqartarlutik. Ukiuni kingullerni Danmarkimi pillaasarnermi killissarititaasut allanngortinnerisa kingunerisaannik Danmarkimi inuiaqatigiinnik kiffartuussisarnep allanngortinneqarnissaanik pisariaqartitsisoqalersimavoq.

Pisariaqartitsinermt assingusoq qularnanngitsumik Nunatsinnut naleqqussarlugu aamma atuutsinneqarsinnaavoq. Taamaattumik inuiaqatigiinnik kiffartuussineq pillugu Nunatsinni maleruagassat allanngortinneqarnerisigut inissiisarfinnut utaqqisutut allatsissimasunut kissaatigineqartumik sunnuteqarnerisigut eqqarsaatigineqarsinnaalluni.

Kalaallit Nunaanni Eqqartuussisoqarnermut Siunnersuisoqatigiinni qallunaat pillaaasarnermi inatsisaanni allannguutit suut pinerluttulerinermi inatsimmut naleqqussarlugit ilanngunneqassanersut ingerlaavartumik eqqarsaatigineqarsinnaapput. Taamaattumik allannguut taanna pillugu apeqqut aamma eqqarsaatigineqarsinnaavoq.

Inuiaqatigiinnik kiffartuussisarnerup sapinngisamik annertunerusumik atorneqarsinnaanerata pingaaruteqarneranik siunnersuuteqartup eqqartuina Naalakkersuisut isumaqatigisinnaavaat. Tamaammat Naalakkersuisut isumaqarput inuiaqatigiinnik kiffartuussisarnerup atorneqarnerata ingerlaavartumik nalilersorneqartuarnissaa pingaaruteqartoq.

Naalakkersuisulli aamma isumaqarput inuiaqatigiinnik kiffartuussisarneq pillugu pinerluttulerinermi inatsimmi aalajangersakkat allangortinneqarsinnaaneranut tunngasut Kalaallit Nunaanni Eqqartuussisoqarnermut Siunnersuisoqatigiinni suliaq suliarineqartoq utaqqineqartariaqartoq.

Taamatut oqaaseqarlunga siunnersuutip Inatsisinut ataatsimiititaliami suliareqqinneqarnissaa inassutigaa.